

壯懷堂詩二集

余友林君桐庚出其先德子隅先生所著壯懷堂初集見贈未逾月復以三集屬爲校訂謀將付諸梓人而二集闕如番禺李恢垣吏部序先生詩云二集四卷爲從軍浙閩時作梓於閩未竟蓋先生橐筆四方羔雁爭迎客途轉徙未及待剗剗之成也今距先生歿三十餘年桐庚少孤不知其處其佚失也久矣考先生初集皆二十九歲以前詩三集斷始於同治甲子爲入粵以後所作時先生年已三十有八矣中間八九年戎馬馳驅關山跋涉感時撫事以及友朋贈答知必有傑作林立若任其散佚則全豹未窺終無以饜讀者之心也桐庚乃

搜剔叢殘得先生手書二集詩百餘篇分古今體而不
分年與初集三集體例略殊且篇什不多知非全集然
內多與閩浙故人倡和及軍中各詩其爲當日底本無
疑又於蠹簡蟬跡中擇其篇幅之尙可檢尋者掇拾而
細校之復得詩百餘篇審爲在閩浙時作因分列於各
體之末仍釐爲四卷存其舊也雖此外不無散失而焦
桐爨竹亦足以音響長留矣昔東坡謂少年文字須氣
象崢嶸及老而歸於平淡非平淡也絢爛之極也先生
初集汪洋恣肆不可抑遏三集則精鍊清老學養深粹
而由絢爛以漸歸平淡實二集爲之樞紐功候之次第

閱歷之甘苦繫焉固不可略而不存也先生年未五十
遽歸道山天不假年不得富其著作由四集五集而遞
增之以與劍南集萬餘首媲美未嘗不爲先生惜猶幸
桐庚珍藏手澤於數十年之後失墜之餘猶蒐輯是集
以成合璧桐庚之志苦而先生之心慰矣校讎旣竣因
述其顛末而歸之光緒乙巳冬月山陰宋壽崑謹敘

壯懷堂詩二集卷一

五言古詩

瑞仲文

璜

中丞一鏡堂落成招同人飲卽席用原韻奉

答

予生恥干時滅盡懷中刺梁園屢見招多感雲霄意因
思宇宙內浮生但如寄所以古賢人往往謀一醉矧茲
豔陽晨韶光炫明媚嘉賓啟華宴高詠傳錦字階前生
意滿春草綠廳事園林擅佳勝清談謝繁吹宵寒漏聲
遲鶴夢破清睡詩成燭且短請罄手中器

房中曲

幽花抱愁眠夜深語嬌鳳風吹鈴索聲驚破鴛鴦夢鴛鴦故有情妾恨未分明懷中秋月墜枕上玉釵橫袖藏雙玉玦與郎誓貞潔上有五色絲共綰同心結郎來月已西郎去放嬌啼莫忘

去聲

房中樂天涯碧草萎

羅敷曲

東鄰有好女自名爲羅敷問年幾何許綽約十五餘采桑南陌頭日夕不盈裾誰家少年子立馬當路隅欲將寄心曲所愧無明珠兒家有夫壻何用立踟躕

題俞復生慈竹感秋圖三十韻

幽幽谷中蘭荒荒陔畔草哀哀雲雁噉匝匝林鳥繞朔
風飄前楹斜景轉西顙攬茲時物異因之廢蓺蓼俞生
樵李英羣期慶門寶夙耽白茅詠苦耐菜根蔽孝思出
天性祖德克勤紹憐余失怙恃相見各傾倒自言少薄
祐閔凶遭不造蒼天胡太酷冲齡奪皇考煢煢守常訓
稍稍離襁褓篝燈課兒讀寒宵伴繹繹喜兒有成立鬢
宮奮身早家貧出負米庶博侏儒飽男兒四方志爰躡
南州蹻三年甥館棲放情恣探討思殫金穀精職樂簪
纓小遙饋兕觥心永視榮萱好家書報平安慈顏慰衰
老甲寅值喪亂行蹤竄窮島桓桓虎旅至櫟槍幸旋掃

征途荊棘開烽煙息秋杪慨然念故鄉琴裝趣官道落
日返里閭悲風動丹旆入門啼失聲徽音痛長杳茵幃
積重塵盂飯薦新稻摧傷愴心胸麻衣顏色縞長思罔
極恩安得去懷抱階前玉樹盡庭竹亂叢篠繪圖誌所
哀聊以鑒蒼昊

爛柯山

仲冬雪霰集百草紛以黃登高一眺望下見古戰場殺
氣亦何高烏鳶啄人腸殘陽帶崦嵫日暮多感傷石室
鬱厓麋中有古佛藏紅巾昨經過虔劉哀國殤千年白
蝙蝠側翅傍我翔仰窺天隙微俛墮傾崖防王質眞仙

人小立數十霜斧柯爛幾時令人思故鄉古今一須臾
悠悠還彼蒼

大竿嶺

夙齡喜登陟險要聞此嶺今茲履其巔入望得統領縹
嵐置天外綺霞散靈境漸看雲勢歸稍覺水光耿古藤
羃傾崖亂松吼絕頂懷祿託蘭茝思鄉念萍梗來蹤旣
云邁往躡還驚省亟當勵士卒早繫樓蘭頸

小竿嶺

日落風蕭蕭旌旛自高颺吹笳達中亭倦馬踏孤嶂猿
聲巖際動鳥影木末望詭石突向人斬絕不一狀荒溪

暴流激已漫沙脚漲賊餘斷炊火投宿誰倚傍峰迴叢
篠盡前途漸平曠橫戈日逐北殺戮非所尙

宿仙霞嶺

嚴冬亟軍事日進不少休暮從嶺頭宿旌旆何悠悠黑
夜自北來狂雨忽翻溝松篁色昏翳鬼語聞啾啾雨歇
檢行李淋溼非吾憂下視井里烟十室九不周小民亦
何辜慘然遭寇讐升高拜遺廟壯繆豐功留保障徧東
南維神恢大猷一綫係安危逾嶺誰同仇據茲形勝地
雄關扼咽喉小醜漫跳梁安容逞戈矛王師日夜至一
舉殲羣酋揮鞭勵戰士旦夕取封侯

龍鼻頭書所見

寒日慘欲落四顧迷征塵橋迴馬驚蹶知有路死人叢
叢茅蓬根白骨何嶙峋不知誰姓名貴賤安可詢前行
徧空村時見新鬼燐荒亭無片檐下卧三世親老嫗瞽
雙眸問年八十春少婦藉草坐呱呱啼苦頻壯者四五
輩面目與鬼鄰飢齧枯樹根寒燒野澗薪備嘗登頓勞
餘此未死身我方裹餓糧恨不能指囷聊分斗與升重
若明珠珍持以告母妻感涕雙腮勻哀哉復哀哉願君
勿更陳

種蘭

種蘭空谷閒芬馨自幽遠綠蘿託芳鄰青松衛根本東
牆桃李花徒自炫園苑春風一朝去容華日銷損何如
王者香高風披九畹采采寄所思山中歲華晚

過塗嶺

去家方幾日胡爲厭征役嶺路厯崎嶇日暮愁行客爲
勤王事急勉整長途策非能棄鄉井聊復振羽翮暑風
扇平野炎日照大澤登高一瞻眺酷熱俱辟易入林葉
非陰飲澗泉不液觸境已憂危撫時增嘆息鯁身念未
靖鹿耳坐可惜寄言邦族人吾生豈終極

贈曾星齋

光斗

太史

曾侯溫恭人見我吐情性清才出冠時靈芝獨輝映奉
親有愉色鄉里稱至行豈無終南路絕迹惡奔競嗟嗟
濟世英所惜乏尺柄軍門特好客相徵到華邴臺陽飛
羽急疇使盜賊橫事權日紛更嬖倖羞秉政世途何險
巖舉足輒阨穽忠信涉波濤死生孰非命及時須努力
長貧未爲病好當勵身手一出誅梟獍竭來共杯酒對
之顏色正海城秋漸深木脫晚風勁相期在歲寒試味
洛生詠

程黻卿

咸煒

茂才出其載生吟稿屬爲點定賦贈

賈傳哭金門慷慨策時務寥寥天壤間千載不一遇程

生越水英久裕濟時具奇書渺不讀屑屑計章句待空
冀北羣未逢伯樂顧憶從辛酉冬相賞在歧路彈棋游
戲耳奕秋應卻步鉤深構幽思握算精計數我時趨浙
難分手已歲暮一年斷問訊或恐鯉魚妨比來兒女累
行行訪親故連朝風雨疾岑寂困旅寓忽聞剝啄聲有
客就譚吐登堂相見驚安得此良晤爲言賊中至餘生
出窮胯空山盛飛雪旬日無飽餽奔馳勞祖母提攜憫
嬰孺間關數千里近喜獲小住中宵念子季淚落如汞
注色殊談虎變膽直說鬼怖新詩饒裏底哀湍瀉幽慕
攬身脫鋒鏑合載生注覩茲我心感願君勿重訴男

兒四方志休爲儒冠誤試舉扛鼎筆待奏凌雲賦黃河
有時清請君守吾素

駐軍遂昌

昨辭石門道移屯趨遂昌關河日奔命將卒各不遑經
過幾城堡守者皆已亡賊來無定蹤機迅如風颺哀哀
前驅士十人九病傷翔颺撲面迎骨凍走且僵日夕望
松陽傳烽猶未央遄征履荆棘歆側循堵牆從軍信云
苦幾人還故鄉

收復松陽登城南樓遠望有作

登樓一瞻眺千里烟塵昏嚴冬變草色飢鴉啼縣門白

骨多如麻槎朽滿郊原城中數萬家幾輩猶生存
繫羣俘應識

王師尊歎此無知氓環脅窮迫奔就擒膏鑽斧憑誰問
銜冤劫運猶未希天心實難論

石洞

兵戈日相接督戰乃我職執麾陟層岡衰草皆死色崖
巔得古洞削壁何嶄削廢祠香火稀神像半苔蝕千年
白蝙蝠橫出若梭織魑魅向人啼狐狸出我側覩茲氣
慘阻收金日已昃歸途俯無地失足奇鬼得

七言古詩

留別聖堯子駒上舍錫三穀齋明經

年來吾儔鮮生色一一去作諸侯客東馳西走竟何爲
唱徹陽關淚沾臆丈夫三十不得志徒使頻年怨行役
黃童江夏舊有名陳子太邱聲嘖嘖卽如林逋與郭泰
當時亦數文章伯秋風搖落雙桂枝三載金門遲射策
余將挂帆揖君去千里名山躡雙屐潭陽水接九曲峯
何處清游少行跡人生聚散那可定有酒但須醉今夕
離筵絲竹不成歡無語相看情脈脈我時愁生動魂魄
溪水長流豈終極日落雲開孤櫂移娟娟暮靄搖空碧
送禮堂子翊豫庭子恂藹仁子珊兄赴禮部試

江城十月天氣灑滹沱河水生寒冰嚴風日催計車發
相逐萬里歌賓興梁生才高氣莽蒼上聲馬子筆健心飛
騰龜山千年有賢裔並慶家學能祇承龔郎妙齡擅文
采意態蘊藉神端凝吾宗子羽更絕特爽颯俊骨如秋
鷹同儕少年六七子一一各盼雲霄登嗟余困頓落塵
壤豪氣未減餘鋒稜嶽嶠厯落不世合談笑一任旁人
憎知音且喜得賢宰謂雪樵先生就學不惜來擔簦片帆去
挂建谿月山水到眼明千層天涯自此暫揮手壯志他
日期鯤鵬

寄懷楊三子恂舍人都門

去年送君賣卜橋橋南梅花開正驕別來夜夢墮溪月
離思日逐征鴻遙今年憶君沈溪曲東風吹暖梅花屋
臨觴清歌斷復續開襟坐對千峰綠漢書一卷酒百壺
山城僻處傷羈孤故人萬里隔顏色況值大地飛軍符
賢兄都下來謂豫庭暫息丹邱羽慨然念故交致書爲我
語道君春明不得意遲向人間作霖雨竭來簪筆依紫
微龍池日月生光輝五花六押豈意足要爲紅藥添新
詩新詩自清絕旅恨從誰說知君欲歸歸不得孤負鄉
園好明月君不見林錫三梁禮堂楊雪馬子龔講郭穀儔
相逢無地無糟邱我欲從之爲勝游關河歲暮路阻修

又不見陳子駒黃聖堯夜夜金尊與檀板湘音樓接瑤
鶴峯何處歌聲不腸斷因君我亦揮素琴故人一字真
千金春風轉眼好相見各訴相思江水深

題姜春明

士彬

別駕仗劍圖

虛堂夜雨風瀟瀟高燒紅燭翻銀瓢酒酣痛讀劍俠傳
眼底久已無票姚姜生江北來意趣鬱不樂手出生綃
一卷圖道是施侯爲君作就中畫意誰得知盈懷有刺
羞千時平生仗劍走萬里海角天涯隨所之年來飽歷
風塵味時艱不信文章貴學書學劍竟何成好脫儒冠
從校尉卽今湖海方用兵榛荆滿地身世輕故園有家

歸不得掉首翻作西江行烏虜姜生爾曷不騁步謁金門長歌入燕市挾策萬言動天子鬱鬱胡爲久居此勸君且自開心胸從來神物終當逢張華十載謂椒雲方伯數知己此去前津定化龍

瑞仲文中丞招飲犒勤堂卽席賦呈得操字

海城九月秋風高關河旅雁來翔翺長空一碧渺何際銀河萬里翻飛濤燕山中丞好士者招我一醉千葡萄聊齋酒令三週遭旁及射覆兼分曹老拳毒手來喧呶左手仍自持雙螯重陽近矣風雨號促我補賦劉郎饒當筵刻燭休使逃倚醉暢灑燈前臺方今羣盜多如毛

千戈滿地軍誰操願公早出揮旌旄戰士一一鄂與褒
腰橫大箭手握刀一戰要使弓矢橐犒勤不惜羣牛羔
太平宴啟呼醇醪斯時有酒還須豪嗚呼人生有酒應
似今宵豪

附和作次韻

長白瑞璣仲文

犒勤堂對秋山高山雲片片逐雁翔喧闐騶從集
羣彥歡呼上震飛松濤年來卧病久戒飲新獲一
甕甘葡萄賓朋相聚難輕遭那分主客爾我曹況
離重陽不三日預作佳節炊霜螯才人每感涼蟬
號子京九日曾題餽暫爲投轄君莫逃曷請趁醉

揮銀毫嗟余鬢髮加二毛歸舟欲放無人操忝膺
恩命秉節旌涓埃未報慚榮褒厯膺報鉅餘鉛
刀相期寰海歌弓燾味無烝豚與魚羔招邀花下
呼醇醪賦成七字稱英豪是時賦成七字直英豪

贈徐蘭橋

文瀚

參軍

徐熙畫筆今無倫繪物往往存其真剗刻造化走光怪
點綴花月皆精神座中乃公獨磊落眼底豎子空嶙峋
醉向蓬萊頂上卧拍手大笑三千春

黃大聖莞游石鼓歸爲余述遇雨之狀走筆賦此

黃生揖我凌晨游要觀遠海登高邱城東之峯數窮崩

謂此可以驂花蚪會逢中途變陰晦罩頭疾雨如麻抽
風霆萬響腳底出俯瞰下界浮雲浮玉山槎枒雪海立
神鬼對面來啾啾重崖瀑瀉一千丈怒吼直倒銀河流
林端忽豁夕靄見斜日正挂西山頭歸途恍然隔世代
此景天造非人謀入門狂叫爲我語掀裋捉臂疑尋仇
一尊落手且須盡醉倒鼾息聲如牛新詩甫成待君醒
明月在戶風蕭颼

曉將別行

玉漏無聲篆烟燼昨夜芙蓉落紅訊雕窗曉夢搖惺忪
半鞦花枝墮雪鬢美人睡足啟鮫綃一綫輕紅枕上潮

青絲凝香玉釵膩此時欲別還魂銷嬌起妝臺立綽約
鏡對雙鸞懶梳掠新釐白映手纖纖獨倚牙牀親侍藥
門前紅日嘶青驄促行卻自羞書僮出門將去復攜手
回頭一笑生春風珍重櫻桃花下別脈脈相看轉嗚咽
銀鞍努力慎前途但遇閒花莫輕折

投壺歌慶制軍席上作

四座毋喧呼聽我歌投壺投壺之禮古所重酬酢賓客
爲歡娛瓊筵畫開盛肴饌試效登降歌騶虞壺高二尺
立楹側修頸盤腹鑄氏鳧金銀雕鏤其象物班駁直欲
彝銅俱主人奉矢調且勁或朽或棘鮮所無後先敘定

勢凌掉脫手得失存須臾凝情定志鬪雋妙性氣此時
安可麤神姿端遠者誰子累掇連取輕柔弧隼翻兔走
輒貫竅旣入躍出無分逾座間競起嘆奇技引臂未與
他人殊因知立身貴正直命中豈必爭區區庭前槐陰
日卓午玉笋淨洗傾醍醐銅音錚鏦雅歌發落葉灑灑
盈前除

繡鞋行

佳人二八眠初起翦翦青瞳醺秋水淩波羅襪碾香塵
彩鳳雙飛落珠履低頭俯拾羞可憐小姑含笑倚香肩
瑣雲仁試彎彎月夜雨新開瓣瓣蓮棚兒嘖嘖誇鍼綫

偷傍屏風致深眇明朝恰是踏青期爲語郎君好扶倩
屏風謠

檐鐵無聲簾蒜靜寶鴨沈沈春晝永闌干轉處繡屏開
滿地香痕墜花影銀蘭玉樹交枝柯鸞杯仁泛迴梁渦
箏絃十三彈欲斷雙鬟綽約愁青蛾座上看衫半霑溼
倚醉芙蓉抱幽泣玲瓏寒玉夢陽臺尋芳蛺蝶雙雙入
雞將雛行

頤園草深滿春色宿羽飛禽少不得舊畜三年老母雞
牆東高柵棲孤翼昨朝九卵將雙雛窗坳布粟呼朱朱
或前或卻靡定所母啄子亦相奔趨高空蒼鷄猛無匹

側翅翻然攫其一老雞日導一雛行猶自花間拾餘粒
何來狸奴特不仁日窺夜伺思啖頻老雞怒走與相搏
狸嚙母頸捐其身雛時悚惶奮翼走子立煢煢鮮儕偶
黃毛綠距日長成睨視依然肖其母東鄰有雞雛且多
雌者伏地雄巍巍狸奴垂涎未敢近利爪鐵喙將奈何
吁嗟乎世情但自論強弱時去鳳凰不如雀青天碧海
任逍遙南來正有孤飛鶴

海風行

少時走燕薊慣受北風刮不圖壯歲來海濱到耳常驚
颶風發初吹盡教毛骨竦漸緊如遇金兵突砰訇澎湃

疑海倒對面，渾驚鬼神入。青蠅無聲黃犬噤，千載老松
會顛拔。我時飲酒氣正豪，得此真堪銷鬱勃。東南滿地
長荆棘，願屬封姨去。條達詩成燭燼不成眠，蕭蕭木葉
檐間脫。

強擡謠

九理洋頭怪風起，糾糾何來健男子。摩拳擦掌喝道旁，
六十銅錢擡十里。輿夫相視不敢怒，垂手低頭去不顧。
輿夫去，主人驚持帖上府，求點兵訴之。長官長官曰：已
君不見烏旗來，白旗靡。殺人如麻，親族喜又不見白旗。
來烏旗恥痛復前仇，勢乃止。敝邦習俗，原爾爾從之者。

生違者死勸君出門少行李吁嗟乎豺狼當道從茲始
漁溪老妓行

凌晨渡口來暮宿漁溪驛入門微聞粉黛香繞座半是
笙歌席誰家少年輕薄兒醉擁妖姬夜觴客推襟送抱
恣歡謔三百青銅輕一擲我時旅游倦心魄強起偷鑿
鄰家壁眼看燈炮酒亦闌別抱琵琶叩門入沿牀啟口
奉檳榔團扇遮羞臉微赤杏紅衫子茜草裙眉嫵灣灣
鬪新月貢妍獻媚百態生佇立含愁情脈脈自言本是
良家婦生長深閨人不識自從夫壻覓封侯年年怕見
垂楊色閒花幽草幾春秋飢寒遂隸烟花籍薄倖曾邀

杜牧憐溫存深荷冬郎惜徐娘雖老丰韻存風月休教
負今夕同行數子椰榆起笑我溫柔露形迹定睛細看
頭爲低問歲何曾過半百欲行未得驚且癡轉瞬頓覺
千憂積人生及時貴行樂底事頻年苦勞役有花好采
春前枝莫待花殘空歎息

醉歌行走筆呈鄧雙坡

廷構

觀察章果堂

倬標

太守

海風驅片雲逼日作秋暑主人敞華筵所聚多酒侶座
中鄧侯最神王使酒談棋顏色壯揮肱勢欲傾千觴劉
伶李白皆惆悵六橋司馬沈且潛對此高譚訝奇拗口
雖不言心咄嗟意謂諸君特疎放獨怪洪別駕見小殊

可憐閩地無地無山川紹興以來數人物紫陽首已推
前賢游楊劉李世頗重絕學早足光閩天一言爲知爲
不知白圭莫惜師陳篇朱君厯落人相逢亦草草一官
未試百里才但羨富陽山水好林生爾何物嫚罵四座
驚讀書不能破萬卷空負萬里邊城行論交海內一何
晚老成凋謝無時英卽今帶甲滿天地咄咄豎子皆成
名天心厭亂定何日提劍欲挾浮雲平主人笑且歌勸
我進杯酒古來萬事無何有豈獨白雲與蒼狗吁嗟乎
醉歌兮歌未央銀河耿耿秋月涼大笑仰視天青蒼擲
筆任笑狂生狂

金谷歎

七月晦日感石將軍事作

君不見石崇當日稱豪侈百萬金錢買羅綺聯翩車馬
爛盈門

行筵夜深死階前三尺紅珊瑚條榦絕世

光彩殊尋常擊碎鐵如意眼中何有三君夫後房惻惻
啼嬌鳳金翠輝煌絲竹弄蠟薪厠棗漫驚奇椒泥錦障
何曾夢金谷園中不當春飛花猶學墜樓人繁華蓋代
今安在獨倚雕欄一愴神

經石氏舊塋

東郊荒塚多如雲百千萬億難區分豐碑七尺獨巍立
問是石氏唐時墳入閭第一推初祖部尉功名說齷齪

南宮姓氏付流傳千百年來此坏土歲湮隴道將就荒
白兔作窟黃狐藏子孫滅沒孟飯涼牧兒躑躅行人傷
自是君家有華裔重修細署軍門字墓田大啟羣塚平
從此春秋得嘗祭空山何處聲啾啾榛荆滿地飛骷髏
舊塚成新宅圯猶竟堪輿選風水老鴉啞啞喜鵲喜門
前唧唧啼新鬼

延平太守行

太守金姓名萬清字穀生浙江紹興進士沈毅果斷
官於閩有聲戊午粵匪擾沙順督師勦賊援軍不至
慷慨罵賊遂及於難

延平太守今廣漢爲郡三月稱勇斷郊有狐狸不敢竄
山魃窺人走流汗人好爲易太守好爲難辭侯官回永
安永安城外多荆棘手持佩刀日殺賊永安平沙順急
白日連城飛羽檄賊來何多太守呼渡河太守勿渡河
援兵不至當奈何軍吏訴太守怒拔戟前驅去不顧賊
拜太守太守聞姓金笑而不答聲沈沈沙場馬革平生
心太守前賊眾至萬全坑畢公志

宿處州山中村民獻小虎二山羊一時溪漲橫流賫糧
未至藉餉軍士作詩勵之

枯州山勢蹲虎形巖石倒落聞虎腥虎出食人遺小虎

村氓持與山羊伍草繩縛置來軍前共道願獻不取錢
爪牙去盡勢猶猛顧盼臨風意思逞小虎吼山羊驚起
觸破壁何翻騰山羊呼小虎怒近嗅人衣欲奔赴一羊
二虎非同羣蓄之轉使軍心紛況當三日怨楊腹殺虎
烹羊一飽足君不見南山羣盜方狼狽裏脅百姓如驅
羊明朝搗穴得其子獻俘營門還舉觴

哀江南

黑風驅雲大星吼金陵城中墮天狗哭聲上震天爲昏
十萬貔貅不能守有客新從賊裏來入門欲語心卻哀
全家八口遭喪亂一身九死藏蒿萊上天豈真開殺運

無乃統帥爲禍胎丞相行營秉節鉞膽怯心輕不忍殺
中山華胥空巍峩肉食何曾解征伐總制遲從賊後至
將軍肯向兵前發敢戰只有一軍門近亦衰老憐軀骨
百萬徒糜內府錢兩年醉卧臺城月臺城從古帝王州
龍蟠虎踞形勝留英雄霸業久寂寞過眼六代成荒邱
豈期今日更兵燹達官半就南冠囚可憐一片秦淮路
古柳啼鴉怨朝暮倦客能生王粲悲詞人淒斷蘭成賦
一杯勸客爲客歌大江流水生迴波關山到處夕陽盡
滿地干戈奈爾何

君馬黃

君馬黃我馬驪君馬青絲絡我馬黃金羈兩馬相逢洛
陽陌高冠照耀生顏色並轡何須競後先冶游同是侯
門客大道朱樓定幾重家家絃管醉春風燕姬十五顏
如玉搖鞭共就倡家宿

正德內教場歌

九重闔闔凌農闕內官結束登雲臺紅纓小隊擁仙仗
知是君王閱武來將軍舊自號威武戰士桓桓氣如虎
驃騎合屬江與錢鎧甲堅摧萬枝弩森嚴號令下白天
指揮意氣真無前旌旗沸處兩軍合犒賞不惜千金錢
往者豹房及家裏爲樂昏昏仍未已放鷹一獵吳陵秋

打魚再飲龍江水凱歌唱徹來維揚金花戎服何輝煌
飛鞭笑指隋隄道此是楊家失鹿場

壯懷堂詩二集卷一終

壯懷堂詩二集卷二

侯官林直子隅

五言律詩

答敬叔

風塵今暫別於子，獨依依客路誰。
邊盡人情昨夜非，褰衣憐弟妹入夢戀庭闈。
且喜江帆穩吟情，委釣磯。

延平謁太守金穀生

萬清

先生

前歲橫戈地，烽烟接郡城。
近聞洋口警，新領順昌兵。
策馬山連瘴，吹笳月在營。
多慚揮露布，幕府重儒生。
建寧與郭五兼秋

身世萍蓬際琴裝盜賊餘官程霜色緊驛館夜燈虛對
酒傷知己因風夢故廬還家應歲暮雨雪渺愁予

觀瀑

亂山紛雜沓流水各東西問此古時澗匯爲何處谿深
林通石氣幽竇露天倪落葉紛然下江風向晚淒
月夜城頭散步

灘聲流不斷萬古此潺潺皓月晴橫漢歸雲夜帶山羣
蛙喧草亂殘角隔溪聞客久吟情減何因俗慮刪

謝章壽君

延禧次韻

朝來一把晤磊落見生平入世傷交道臨歧重別情雄

心仍劍鏢佳句自瑤瓊瀾迹予增愧疎狂浪得名

南溪懷古和丁特卿

上達學博

朱子祠堂在千年俎豆尊斯文接鄒魯吾學溯淵源流

水當門逝梅花破臘溫考亭同歲暮展拜意敦敦

去冬客建

陽曾謁考亭今忽忽一歲矣

贈李鏡芙

劍潭

茂才時將赴趙珠浦廉使幕

李子窮途日林生太息初依人千里路負爾五車書對

酒休看劍談詩一攬裾平原能愛士去去莫踟躕

歲暮答蕓秋

甌建今無恙連汀未罷兵英雄思用武豎子枉成名歲

晏增離慕時難仗友生憑西一帳望江水若爲情

附原作

湖海今多事勲名近益奇微言詩不諱愁緒鬢先知
亂久傷爲客書多恥課兒羣才正牢落敢說買山遲
得江嵌叔杭州訊卻寄

與子三年別書來慰所親飢寒銷壯志風月憶清塵
官小聊堪隱詩高不諱貧西湖富游侶莫漫意逡巡
題余澹心板橋雜記後

一代興亡淚頻年感雪泥江山餘醉筆花月老香閨舊
夢重重記新愁黯黯題秦淮嗚咽水不敢過橋西

雪意

昨夜朔風緊寒雲今始深江山千里靜樓閣萬家陰古
木僵能立孤禽凍不吟青閨有香夢正自擁重衾

題姚筱園二尹姜山讀書圖

姚子讀書者入山期必深高才聊枳棘有道漫泉林攬
卷秋聲賦放懷梁甫吟武彝草堂在歲晚好相尋

戊樓

夜靜萬家夢長空時倚樓會看今夕月中有古時秋河
漢茫無際旌旗耿未收何人知報國底苦覓封侯

感事

世事一如此眼開今始明
雞蟲聊復爾蠻觸自紛爭
不信春冰薄應知蜀道平
寄言軒冕者寵辱總心驚

福清道中

獨客歲云暮嚴風動縣城
片帆滄海去百里破山行
雲挾魚龍氣天寒雁鶩聲
鄉祠盛香火蘋藻薦精誠

有贈

小立黃昏候含情卻可憐
人從香外瘦月入夢中圓
欲訴心還怯將行意復延
階前有清露暗下草芊芊
愛極翻成妬憐深不算癡
中宵攜手處將曉斷腸時
忽忽成前事遙遙訂後期
春寒無賴甚努力好腰肢

除夕

江上滿離思蒼茫何處來
那曾萬里別又是一年迴濟
世殊無術封侯且未才
明朝已三十猶自守蒿萊

園居夜坐

虛亭上微月窗影滿松枅
螢火靜逾出蛩聲涼漸酣
叢蘭流逸韻苦茗佐清談
坐覺衣襟濕重階露氣湛

憶揚州舊遊

螢火雷塘晚蟬聲廢苑
秋涼風生昨夜明月夢揚州
縹緲仙人地淒涼帝子樓
看花少年事曾典鷓鴣裘

別緒

春事看將盡，況當離別筵。
酒殘明月地，花落美人天。
涼露憶攜手，香雲夢並肩。
朝來羞攬鏡，相與惜流年。

驛路

西郊頻悵望，驛路正迢迢。
斜日明官渡，長沙擁斷橋。
灘聲喧岸急，樵語入林遙。
立馬山千暮，青帘喜見招。

送張椒雲

集馨

方伯移藩江右

旬宣功不細，八度重開藩。
皎日明臣志，長途自主旌。
旗辭海嶠風，雨入章門郡。
國軍需急，無憂支應煩。

傷春

高空青欲墮，深切杞人憂。
渺渺天涯路，飄飄何處舟。
九

邊餘盜寇萬國肆徵求望遠情無已傷春獨倚樓

老馬

老馬西蕃種曾經百戰來騰驤原爾志躑躅不凡才得意猶能騁悲鳴亦可哀君恩何日已生死傍金臺

日暮

故國風塵晚涼生未有涯清時聊可望壯志豈全賒山雨聞清磬關雲入暮笳側身一惆悵日暮動咨嗟

送人之浙

滿眼淚沈瀾時危作客難但思彈劍缺不復問衣冠木落閩天迴雲遲越岫寒生平有忠信海舶自平安

聞黃州警

燈火黯黃州關山赤壁秋江湖鴻雁逝郡國虎狼遊雲
物方多變風帆迴未收捷書何日到辛苦愧參謀
獨坐

閒剔孤燈坐憑誰慰寂寥樓臺秋黯黯風雨夜瀟瀟鼓
瑟不成調持樽聊與澆年來多快事惆悵是今宵
獨立

畫闌人獨立愁思集無端初月寫秋色側風生暮寒思
卿空有淚顧我起長嘆時物原多態閒來得靜觀

櫻桃

筠簾忙不了萬顆獻奇丹色相遭時妬圓勻似汝難聞
人曾摘未山鳥正銜殘頒到金盤賜珍珠相並看

大風雨有作

狂風與疾雨忽忽黯江城老樹盡僵卧重檐相與傾遙
天鴻雁亂深壑鷓鴣鳴行路已多阻羣峰猶未平

月下聞簫

裊娜復娉婷前廊忽後庭漸隨明月上能使彩雲停銀
漢天邊落玉人風外馨揚州何日到悽惻若爲情

欲遊黃華巖阻雨不果

黃華山咫尺十載想攀躋三至不得上一詩聊與題懸

崖空在望溺雨況爲淒蘇徑何年闕回頭問野奚

夢游石鼓

數載別古剎曠懷松樹林春隨花事盡夢與碧雲深一
磬墜遙暮眾峰來此心人生自游戲濁酒且須斟

黃田驛

暮宿黃田驛灘聲總耐聽萬山天外盡一火帳中青驪
雨忽添漲疏雲不礙星前程殊未已曉夢且忪惺

開化寺

梵宇幾時創輝煌忽至今荷香船外度木影磬中陰殘
照紅依檻前山翠滴襟晚涼芒屨疾歸路託微吟

藝亭夜坐

亭欄未覺暮猶復讀奇書危砌蛩吟疾高樓月上初坐

深涼意足酒罷客情疏一枕松風榻陶然

亭名

總不如

裕方伯新得孔雀四雛蓄之安民堂西偏屬詠賦呈

亦自憐毛羽生來便絕塵樓臺全翠地文彩網羅身卻

自家禽翼能隨老鶴馴養將修尾得好與策勲臣

慰陳子駒下第

竟爾逢三黜人高柳下風鵬搏君暫息蠖屈我應同錦

瑟年年怨瓊簫處處工金樽檀板地爲樂且無窮

紀夢

宵來魂不定別去紫姑神夢覺徒增悵愁深易歛顰畫
屏銀燭暗寶枕玉釵湮幾度通芳訊窗梅不當春

玉山

宵深同一醉爲報玉山頽舞鳳春多露顛鸞夜不才何
因迴碧漢卽處是瑤臺吸盡瓊漿罷蓬門未許開

書事

不信蓬山遠瓊樓重復重笑啼如有意出入總無蹤鬢
影須妨亂腰圍漸覺鬆春寒何太驟曉夢正惺忪

倚闌

捲簾新浴罷蘭氣透簾旌纖月眉尖瘦明珠掌上輕羞

多還脈脈立久只盈盈不解相思意倚闌空復情

蝶

傅粉來秦殿輕妝入漢宮飄零隨柳絮生長住花叢繡
闌深能到青閨漸許通鉛華都卸盡獨不耐秋風

燈

疏簾人靜後獨自倚銀缸紅豆年年思瓊簫夜夜腔有
時佳夢到何處曉鐘撞殘焰明還滅含愁對綺窗

夜飲

對客厭厭思懷人故故愁醉傾銀鑿落閒整玉雕鏤翠
裊空儲淚齊紈不掩羞銀箏豈解事辛苦漫爲搗

不寐

夜深愁不寐惆悵倚闌干林月向花靜天風吹襲寒私
書難作答薄夢不成歡三載相思苦何人爲解寬

臣里

臣里東家子年時及破瓜皎顏如沃雪弱質欲羞花蟬
鬢歌金鈿鮫衣拂絳紗夜深瑤月上猶自撫琵琶

明日

萬事有明日此心安且閑虛名二千石初志一房山所
見非疇昔相逢破醉顏澄清應可俟獨坐策時艱

失婢

生小憐貞靜年來惜歲華不遭鞭扑辱豈爲性情奢跡
比秋江鶴香歸別院花秋深風露重今夜宿誰家
定知

豈是瑤臺客相逢入夢中障羞團扇小刺眼下衣紅弱
質亭亭立芳情脈脈通定知消息近昨夜有春風

春風

亦知留不住其奈惹愁何芳草今年綠飛花昨夜多狂
情空自舞好鳥爲誰歌不肯傷離別相逢定見過

小西湖泛月

十里去迢迢輕波弄畫橈天風下湖水霜月出層霄鐘

閣烟中寺漁歸柳外橋夜寒吟未穩濁酒待頻澆

發洪山橋

喜遂從戎願江郵第一程炎風吹夢醒疾雨逼詩成絃
管鄰舟歇旌麾列戍平男兒志馬革誰屑淚縱橫

寄懷龔藹仁庶常

翰林清切地意趣近何如蘭署知分草藜筵憶校書雨
殘雲影散歌罷酒情疏雄筆蓬山峙詩來一啟予

展家文忠公祠

當年依幕下深感眼垂青此日瞻祠宇臨風跋典型威
名永華夏

聖念厯朝廷忠定芳隣接

鄉人祠公於李忠定祠之桂齋

千秋俎豆馨

水口書所見

昨聞南浦警羣盜已屠城覩此杈枒勢能忘戰伐情
鼉鼉白晝鵲鶴自軍聲所惜徵兵緩涕洟對庶氓

三都口

入春無幾日向晚怯微寒霧重添衣屢村遙貰酒難
漁舟歸夜火人語響風灘已釋操防任仍驚夢未安

送甯理堂

曾綸

廉使之任浙江四首

多公能好客屢屢辱高軒鴻鵠天方遠龍蛇道未屯
神仙安可學毀譽豈須論湖海相逢晚休辭濁酒尊

千里遙持節風流冠等僚
懷攜閩海月船趁浙江潮
偉業行看秦雄心耿未銷
爲霖何日已早晚近雲霄

西湖風月地魂夢記曾游
霸業錢王券吟情白傅功
名輕豎子戰伐尙諸侯
慘愴山河色浮雲去未收

滿目瘡痍畫誰登大將壇

君恩天浩蕩時節日艱難
朋舊今何似關河歲已寒
飄零憐弱弟寄語說平安

野渡贈舟子

相見一慘阻憑君橫夜船
已看餘鵠面猶復鸛肩有
婦肯從賊生兒能象賢
斷炊今匝月不取渡溪錢

過黃田驛

六月黃田驛炎蒸已不堪林陰看繫棹烟暝敢停驂王
事提兵亟軍書報戰酣平生磨盾意詎必在肥甘

城門瀧

一雨灘聲緊奔流下激瀧風痕疑捲地雲氣欲吞江飛
鳥去何疾潛虬起莫降余心識艱險一線繫輕艤

楓亭小憩

已過荔枝候我來徒老饒軍夫多白羽村婦半紅衫火
燒千年樹雲沈萬里帆筍輿趨路急心怵日西銜

惠安道上值周子玉

懋琦

主政歸自海外爲述近事

感賦

太息紅夷島經年未有功事權諸將格杼軸一時空困
獸猶能鬪封狼竟不終堂堂觀察使一再竭孤忠

謂孔雲鶴

洪潤堂
兩觀察

陪軍門暨諸僚友登拱勝臺

蒼蒼古衛地嶽嶽此高臺形勢諸蠻合波濤大海迴日
斜龍氣直風急雀聲哀金厦今無事知應有俊才
馬巷曉發示賴沛臨司馬

年少賢通守招予醉一尊最憐明月滿可奈曉霜繁古
驛羈羸馬懸崖有嘯猿鷺門今日到好去訪仙源

海渡

蒼蒼凌海渡渺渺任扁舟身世吾能達烟波客欲愁雲
寒孤島靜風勁古林幽最是忘機者低徊問白鷗

同賴總戎鄭明府游榕林留贈主人黃荔崖

日紀 駕部

主人黃駕部瀕海有名園怪石森能立喬林蔭正繁衣
香生暗室帆影度重垣勝日宜佳侶相攜濁酒尊

登鼓浪嶼

昔聞鼓浪嶼振策喜來登潮落沙痕出雲開海氣激層
崖時見鹿古刹已無僧躑躅屯兵地潛然感廢興

贈瞽丐

亦能餬一口人事莫分明大地隨眠起荒亭有送迎閒

行資短杖餘醉儘殘羹談笑與前過因君感世情

俞仁甫

林

太守招飲署齋作此奉貽卽以志別

太守今循吏清名世所尊荆榛隨地翦桃李及門繁

海恬波浪談經務本原成蠅憂不細小阮獨霑恩

猶子承芬

去歲捷秋闈卷有
外誤承君力獲全

賤子事行役勞勞車馬塵奉親歸塞漠草檄徧關津干

祿非初志乘時愧古人臨觴煩慰藉海泊趁新春

海門夜泊

暮色黯然至波濤驚客心旌旗樓艦集風雨海門深獨

鳥去無極疏林寒自森將軍巡海急羣盜敢相侵

遊福廬山

乘興二三子晚風訪福廬丈人峰自若丞相宅將墟萬
木助蕭瑟寒雲時卷舒此間隔塵境真可謝簪裾
得羅少畊書卻寄

別後相思甚書來著意看此心明月證到耳木聲乾客
況今何似交期永不刊北行有飛雁寄語說平安
興化道上

朝別壺蘭邑北風淒以涼郵旗薯酒熟驛路豆花香白
馬誰家子紅衣比戶妝荔枝天下冠去去不能忘

送王筠齡

延瀛

計偕

與君久相契，交道重吾徒。
風雨幾時合，山川無乃孤。
夜深還看劍，興到且提壺。
不識龍頭日，新詩可寄無。

楓亭道中

冒暑日行邁，征驂去不停。
晚風散茶市，小雨過楓亭。
沙落鹽田出，香殘荔序經。
流亡感浹際，憑吊草堂靈。

送家子珊兄兼示省軒弟

兄弟相睽日，乾坤有事秋。
寒風如許甚，明月若爲愁。
去誰青眼行，行盼狀頭燕。
臺有酒侶，莫惜鷗鷺裘。

送黃子穆兼寄令兄聖堯

難兄吾所友，迢遞隔燕臺。
契闊三年別，飄零絕代才。
風

雲何日已富貴會須來今子重揮手愁腸定幾迴

登雙江臺

暮色蒼然至登臺百感生天低萬漁火風定一鐘聲寥
落傷朋輩遨遊念弟兄憑欄再惆悵畫角不須驚

興化植羅曾

雲溪

大令歸自臺灣

菊花曾幾日雨雪忽霏霏轉餉曾同濟談詩此共歸身

輕滄海粟飢戀故山薇爲道鯨波息

時彰化新捷

因君思奮飛

送羅少畊

嘉杰

中書觀省浙西時將補官吳門

攜手未幾日因君慰寂寥忽辭閩嶠月去聽浙江潮子
舍春長滿郵亭酒未銷南天有歸雁離思共迢迢

昆季同行樂征軒不暫停題詩霞雨驛攬古月波亭禹
穴何年問雲門太古青遙知息游處詩禮侍春庭
中書今佐郡去去向蘇臺令望鸞臺著清才驥足開雞
棲差足樂雌伏未須哀爲慰相思意還應尺素來

送王月三赴台州都督任

共君患難日意外荷栽培魂夢縈知己乾坤待將才相
逢頭漸白一笑眼還開珍重臨歧別梅花勸酒杯

書所見

鉤車向何處日夕走隆隆窄袖鶯雛綠單衫杏子紅香
雲堆小鬢秋水翦雙瞳姓氏何由問新愁付惱公

紀夢

仙姬入我夢相見只依依
卻訝病容瘁仍聞薌澤微
柔腸牽欲斷舊事是耶非
撫枕一惆悵因卿減帶圍
卽事

美人抱瑤瑟爲我一三彈
不共芳樽暖誰憐玉指寒
風簾驚下早茅屋再來難
山路催行急令人憶墜歡

壯懷堂詩二集卷二終

壯懷堂詩二集卷三

侯官林直子隅

七言律詩

秋闈報罷將赴雪樵先生之招奉寄二首

秋風瑁璫感浮名
檢點青衫淚欲傾
同社年來多得意
故人天末獨關情
江湖雙鬢蕭疏晚
煙水孤蓬去住輕
側目風塵滿歧路
飄零冠劍尙儒生

慚愧陳琳草檄才
招邀幕府爲頻開
已無親養貧何害
爲是心交遠卻來
事業卽今歸絳灌
文詞那復問鄒枚
非君斯世誰青眼
到日知能慰酒杯

別廉叔弟卽送其之鹽城

廿年同聚守柴扉誰使臨歧手更揮
天外雁鴻紛自去風前鳥鵲定何依
山園鼓歇茶初罷野店醪香筍正肥
雨雪敢辭行役苦江南猶未解重圍

太平驛

太平官驛古溪旁曾是盧循竊據場
偶向鄰人分芋栗懶聞堠吏話滄桑
高林霧重墜成雨古道風寒行有霜
題罷新詩酌杯酒醉思人事一蒼茫

初二日抵建陽雪樵先生適赴鄉徵時讀亭甫南來詩
錄因用集中周小湖學使贈行韻二首奉寄

驛路看山到建州新詩聊與付傳郵過江敢作千秋想
爲客驚逢一歲周早識歸耕非左計但云招隱豈良謀
幔亭咫尺寒雲隔買權仍期九曲游

就見翻深未見思關河匹馬去何辭西風肯下劉蕡涕
南海虛傳陸賁烈士由來酬寶劍故人何必問行危
鏡中豈少封侯相無奈潘郎鬢有絲

江河樓讀龔樸臣

梓材

茂才題壁詩寄贈兼柬思仁上

人

徧讀江河樓上作知君自是不凡才百年風雅徵文獻
一邑絃歌起草萊客況蕭條知己少酒懷歷落待君開

吟儔喜有高僧在異日期同訪道來

北橋晚望寄懷夏紫疑明府

北橋煙景綠漣漪畫裏孤城半入詩歲月卽今驚逝水
溪山如此合浮卮蒼茫汀樹綠沙轉鳴咽灘聲到縣遲
德政尙傳賢令尹天涯何處慰相思

答章壽君見投之作

對酒山城一放懷蕭條旅況卧衙齋詩人見說貧非病
豪興知君老更佳作客頻年驚歲晚論交何處不天涯
儒生敢問名山業世上於今有虎豺

王雨菴別駕于役沈溪見過有詩惠貽依韻答之

歷落欽寄可笑人十年蹤跡辱相親愁邊作客琴書黯
亂後逢君意氣真宦海波濤增閱歷騷壇風雨證緣因
賈生空有憂時策何處巖廊好置身

九日得聖堯子駒詩札卻寄

閩川詞派數黃陳裙屐風流喜最真我自他鄉爲異客
君從何處寄閒身溪橋暮雨灘聲急歌館殘燈酒氣醇
多恐相思有魂夢夜深易去叩雙鄰近有合著雙鄰詞鈔

贈王月三捷元協戎

將軍能武復能文禁衛清名舊日聞早向燕臺稱虎旅
年來閩海靖妖氛飛騰筆翰陶都督掩抑風懷杜司去聲

升仙生三首二首之三
三
勳自笑儒生餘壯志請纓端欲效終軍

遠帆

蘊蘊孤帆淡不收依稀望斷水邊樓有情斜日遲將暮
無恙西風掛到秋揚子初潮通去櫂洞庭細雨認歸舟
吳頭楚尾無邊盡獨立寒江我欲愁

送郭大穀齋之京時將出守浙中

燕臺賦奕滿聲名總角交游似弟兄一第尙輸君特達
卅年生愧我無成風雲壯志終須合雨雪長途好慎行
盼到春明多得意預知喬木有遷鶯

送陳子駒上舍游江右

黃生

聖堯

去後無詞筆數爾清揚絕代才一笑科名身外

物十年花月掌中杯殘冬作客愁攀柳故國相思正放
梅多幸元方有兄弟宜春西去好登臺

送楊豫庭太守赴闕時將補官浙西

秋盡閩州海霧收郎官出守待宣猷早從幕府推神算
更向金華快壯游日落江干遲去櫂春生谷口盼鳴騶
西湖花月蕭條甚倘有新詩寄唱酬

寄懷梁禮堂考功都門

銓鏡南臺重典章鶴廳舊跡未蒼茫判辭裴垺偏精密
啟事山公獨審詳清士由來歸海岱偉才長此望裴王

談經畫省知多暇風月荒寒伴舉觴

與枚如話舊

十四年來事可聞無因風雨怨紛紛
浮蹤莫問離還合舊夢重尋我與君
北海風流空復爾南臺潦倒欲何云
傷心怕過劉郎浦

謂芭川

宿草荒涼悵夕曛

寄懷黃大聖堯

憶昔與君始相見枇杷花下對尊時
每於酒盡燈殘後細讀春山小雨詩
近日綺懷應慰藉當年朋輩半支離

陳生

子駒

又是西江別暮雪寒天愴所思

送錫三之京

朔風刮地滿塵埃送客懷人日幾回短燭最憐今夕別
清尊況對故人開潮通淮海孤帆遠雪壓燕雲匹馬來
此去金臺莫濡滯時艱正待出羣才

瑞仲文中丞出一鏡堂詩集屬爲點訂奉題四首

開府閩天擁節旄凱歌聲遍暮雲高鄉關烽火情偏繫

時有津門警

郡國胥儲夢亦勞挾纊三軍欣愛日運籌萬里

莫驚濤南樓風月無邊興繞座香煙伴吮毫

頤園差具林亭樂

園爲公任閩藩時所拓

聞道公餘憩此間入幕

賓朋多大雅當前竹石勝名山風迴曲沼通荷氣雨過

重階上蘚斑想見憑闌高詠處年來且喜住仙寰

余時假館

此於

折簡頻邀醉夜光牕勤堂

節署廳事名

畔月如霜絳帷只許

彭宣入青眼能容阮籍狂廣廈萬間春已滿新詩千首
鬢猶蒼獨憐秋雨城南夜韓孟聯吟未敢忘

豈須著作羨承明政績如公有頌聲海內爭傳一品集
人間飽歷五侯鯖文章難得齊勳業菽水尤能見性情
此曰

朝廷南望切治安行告大功成

唐益菴

壩

廣文用謝枚如舊題拙集詩韻見贈仍依原

韻奉酬

頻年傳食愧飢鴉，閱遍侯門萬樹花。
不信美人皆晚嫁，由來志士惜春華。
勳名誰繪凌煙閣，姓字空留賣酒家。
欲共龜年彈一曲，江南淪落舊琵琶。

牡丹同司徒伯芬

淵

觀察梁愛蓮

卓英

太守作次韻

勝事園林漸可誇，天生國色殿春華。
帶圍豈用奇韓相，蠟燭翻疑翦石家。
豔質慣承金闕露，芳名合署海天霞。
洛陽十里都看遍，不羨河陽一縣花。

風流初鬪翠紅妝，古寺名葩數畝香。
取作香燒憐落片，會當釀去試新芳。
笙歌隊裏春將暮，蜂蝶叢中我欲狂。
待寄朝雲何處寄，空餘佳句付奚囊。

記得花王獨占魁年年春盡著詩催陰晴天氣鶯初啞
富貴人家燕正來侍側芙蓉羞瘦損爲奴芍藥漫驚猜
嬌紅膩紫何須問且醉當筵白玉醅

小別揚州二十年東園回首一淒然名花幾見開還謝
舊句誰爲誦與傳紅杏樓臺空旖旎綠楊城郭憶鞦韆
香山詩句維摩畫好景由來欲證仙

江樓

獨飲江樓思黯然千山暮色合蒼煙長橋從古灘聲緊
官渡終宵月暈圓傑起夷樓森未已爭先估客去無邊
波濤眼底滔滔甚把釣滄浪自在眠

櫻桃

垂簷愛結子離離到手圓
勻似渥脂欲比明珠偏帶豔
只輸紅豆是相思幾聲小字
潛呼處一點歌唇乍上時
記得摘花人立否下階銷瘦
病腰肢

水口

十年七度往來頻
雨漿煙帆歷苦辛
燈火千家潮正上
干戈滿地夢無垠
灘聲夜挾蛟龍出
關勢雲低虎豹陳
喜趁長風泊官驛
一杯聊與酹江神

寄家錫三庶常

木天自是清華地
其奈時難未療貧
亦識風雲爭頃刻

每憐湖海尙兵塵高才要鑒前車轍

謂謫仁

壯志須從末

路伸但得歸期歸便好蕭蕭霜鬢有衰親

吉陽

小隊旌旗出北津從軍誰敢怨艱辛晚風阡陌亡青兕
暮雨郊原走碧燐戰士移防兼載水居民焚屋半無鄰
捷書何日甘泉達待卧簑衣理釣緡

八月彗星見於北方

頻歲東南未解兵跳梁小醜亦專城

時建郡七屬爲賊所擾

當頭

星斗瞻天象滿目瘡痍愴物情

渥詔久關民瘼計凱歌新奏大功成

江南軍攻克秣陵關楚軍收復九江

泉其渠帥十年短鬢蕭疏盡夢聽江關戰馬聲

從征臺灣

時林慙晟戴曼生滋事

留別左二篠園

埏

郎中卽送其

歸西江

萬事艱難賴此身飛騰筆翰亦千春
乘桴始願今初遂出岫閒雲或有因
天意經營謀漢楚人情冷落到金銀
勸君努力西江去曠代清才未許貧

七夕雨寄內

去年今夕軍門度今夕軍門又一年
離別豈應怨兒女團圓轉欲妬神仙
星河天上雙雙影瓜果人間處處筵
滌盡鄉愁逢快雨孤燈清枕好高眠

酬洪燮堂

恬熙

通守見貽原韻二首

樂府新聲古押衙
天涯何處不停車
關前明月哉生魄
嶺上寒梅漸著花
到眼烽塵鄉夢遠
入愁絲竹旅情賒
如君才調今無幾
會見傳宣奉

詔麻

醉眼難禁落日黃
人生容易感星霜
南船北馬頻年別
西兔東烏作底忙
蓋代雄才空悵惘
昔年幻夢總荒唐
當筵喜聽陽春曲
沁人心脾一味涼

鷺門晚眺

鷺門烟水晚蒼蒼
笳鼓無聲落日黃
荻港戈船嬉水戰

連檐華屋聚洋商，南金大貝操奇至。龍戶鯨人入貢忙，
權估不須心計吏。

聖朝久已盛梯航。

上胡畫溪

光瑩觀察

巋然獨數魯靈光，回首京華二十霜。舊雨忽來清吏後，
白雲猶記丈人行。亂餘作客勞珍重，酒罷行歌易慨慷。
多爲憂時頭漸白。

聖朝未許老馮唐。

大地兵戈已十年，軍需費盡水衡錢。籌緡久念司農匱，
奏捷新聞節使賢。何處江東懷李白，於今海上有成連。

九
被廳可憶當時事紅燭清歌待夜筵

與劉覺岸

良荃

夜話

與君世業共清門前歲從戎約弟昆籌海經年鯨浪靖

爲關今日虎頭尊

君時奉檄
權閩海

天寒鴻雁呼儔侶歲晚黿

鼉競吐吞咫尺龍宮應得到一帆相送莫辭煩

贈鄭雲襄

秉機

司馬卽送其歸省

手戮鯨鯢氣亦平相逢今日且飛觥結交我亦傾湖海

相士君堪託死生官閑梅花清宦後他鄉明月故人情

高堂白髮蕭蕭在歲暮應知盼遠行

上周鐵臣

揆源

廉訪二首

文章經濟並優優良吏於今不可求

心簡早應隆

北關口碑久已遍南州當關虎豹風雲晚拓蟄龍蛇瀚
海秋堪笑林宗歆塾角也思謬附李膺舟

壯歲封侯願已虛風濤海上渺愁予一官未就羞投刺
十載從戎悔讀書世路幾人託肝膽

朝廷此日急軍儲東南大局憑誰挽恥向清時賦索居
病起

鞦韆庭院晝陰陰病起妝臺瘦不禁半榻茶烟收藥裹
一簾花雨襲香衾新詩脫手和愁寫薄酒沾唇覺味深

小妹嬌癡無箇事泥人辛苦教鴛鴦

潭州留別楊心淵

祖學司馬

兩度營門聽鼓回相逢今日又銜杯江湖歲晚迷鴻鵠
烽火人間徧劫灰五日湘閩同吊屈千金燕市合逢隄
高陽酒侶知多少紅雪圍鑪待汝來

桃花

淺淺春寒漠漠陰小桃花發漲前林江潭送別難爲淚
露井論愁豈易心細雨鸚哥空自喚晚風燕子漫相尋
劉郎或有重來日惆悵東風已至今

壽王蓉湖

鏡元

司馬四十初度四首

江城纔過試燈天
命酒龍樓啟壽筵
入座衣冠多大雅
陶情絲竹樂中年
前身合證如來粟
此日同依相府蓮
且喜梁園好賓客
東南竹箭正娟娟

青箱事業足吾師
幕府風流喜見之
魏灌交期偏恨晚
范張信誼不嫌遲
梅花明月談元地
紅燭情歌中酒時
羸我一生低首處
右軍書法軻川詩

儒冠早棄意何如
官道仍遲驥足舒
燈火十年勞案牘
烽煙何地罷軍書
鑑湖風月春無恙
時謠傳賊氛逼紹郡 粵國河

山夢久虛

謂兩菴都轉

捫蝨緩談天下事
蒲輪來日待徵車

三十封侯歲已過
擁旄仗節復蹉跎
依人終覺謀生拙

知己其如欲殺多絕代琴心誰與和頻年盾鼻笑空磨
期君努力澄清志青眼當筵且放歌

聞杭州警不得舍弟廉叔訊

正值傷春春可憐南來烽火況連天音書隔絕三千里
言笑睽違五六年荒海瘴雲濃似墨西湖暮雨碧如烟
相思此夕無人會夢落關河去雁邊

再寄一首

杭州自昔錢王國鐵券飄零萬事非南渡衣冠禾黍外
西冷朋舊信音稀愁深古剎神燈黯青入荒陵鬼火微
江上看雲思弱弟全家八口好應歸

建寧寄廉叔

芝城西望滿烽塵把酒狂歌氣自振三五夜中初上月
一千里外未歸人策時懷裏空餘草轉戰乾坤暫息薪
露布潭陽新奏捷論功近已策勲臣

芳鄰

咫尺蓬山枉斷腸下風倖接夜來香綠珠從古售無價
碧玉於今抱有郎往事淒涼猶髣髴昔年夢寐總荒唐
將身願代鴛鴦枕相就相親傍洞房

話舊

輭綃紅淚勞相寄減盡腰圍總爲卿入夜柘枝呼灼灼

長春芳草醉瓊瓊玉釵未合魂先斷翠被重溫夢易成
此日相逢倍惆悵春花秋月十年情

書恨

舊恨新恩付阿誰東風銷損病腰肢
錦薦春寒夢未知碧樹流鶯情旖旎
別來十載湖州路開到蘼蕪信可悲

詰婢

十五盈盈喜畫眉中宵風露與誰期
薌澤微聞滅燭時急整花鈿神髻影
不須密濺桃花淚我見猶憐恨已遲

春思

相見天沮袂又分新恩昨夜感慙慙傷心六幅湘江水
入夢巫山一段雲階草含愁同繾綣爐烟欲燼共氤氳
最憐臨去秋波轉一曲驪歌悵夕曛

春寒

淺淺春寒護碧紗夜同神女話生涯殘煙小檻愁痕著
細雨疏簾夢影遮誰惜飄零同柳絮更無消息問桃花
相思何益腸空斷樂府新聲古押衙

馬上有贈

七寶鞍連錦繡韉玉人薄醉杏花天春深到處堪留跡

年少何人許比肩乍見遲延情婀娜最憐歸去影翩翾
鈿車十里城南陌但得相逢願執鞭

相思

玉簫吹罷暗分攜珠閣風寒燭影低天上幾曾探月窟
人間何處覓雲梯輕盈生愧孤鸞鬢瘦小空憐贈繡鞵
欲寄相思誰與寄牆頭暮雨正淒淒

淚

錦瑟年華不可追好花好月誤佳期每於燈下空憐影
任到風前懶畫眉蠟燭有心同惜別芙蓉無語最相思
湘江竹與長門賦一種淒涼欲怨誰

寓懷 二

別來心緒亂絲棼一種柔情孰與分天上銀河如許迴
人間玉管可勝聞待尋蓬島疑無路何處巫山不是雲
西望瑤池千萬里擬煩青鳥報慙慙

寄遠

勝黛零脂悵別離自君之出淚如絲拋殘團扇香塵外
贈到中衣夜雨時爐鳴銷沈留恨字鏡鸞愁疊寄情詩
春宵孤負鴛鴦薦獨倚蘭缸下翠帷

暮春

經春愁思亂如麻懶逐城南金鈿車鴛鴦夢幾曾勞漢女

雁書誰與寄秦嘉杜鵑有恨啼芳草粉蝶何心戀落花
自笑年來情緒減小窗睡起日初斜

紀豔

半簾斜日有梳妝夜色初侵已上牀自此橫陳一玉
從教回抱識王昌窗前細聽流蘇響被底微聞薜藤香
情極不知心力盡爲卿憔悴爲卿狂

憶昔

憶昔西齋握手行臨風一笑兩相傾倚簾窺去魂難定
隔座看來眼倍明才許情詞通叩叩曾將恨字寄卿卿
無緣卻怪鄰雞早驚斷鴛鴦夢不成

席上有贈

香肌柔膩氣吹蘭妝罷寒衣倚畫闌
一桁春山堆黛綠
兩泓秋水射人寒
新鶯乍試珠喉轉
彩鳳都歸玉指彈
繞座半皆行旅客
爲卿滴淚不曾乾

春陰

惱人天氣雨如絲
兩地傷心各淚垂
客裏不堪誰送別
夢中無語只相思
春深門巷愁偏長
月暗關河鬢易衰
逝水年華無那過
江南況是落花時

感事

空負瓊林奪錦才
慚騰如夢卻堪哀
入門未省烏龍吠

踏地時歌赤鳳來金屋尙縫連理袴綺筵互醉合歡杯
庭前無數閒桃樹不盡劉郎手自栽

贈歌者

斜抱琵琶半掩羞新鶯一串嚙珠喉爲燒麝炷薰歌扇
巧折鸞釵當酒籌入夜眞稱香暖手當筵肯惜錦纏頭
漫辭靨輔紅潮上擊碎珊瑚樂未休

贈舞者

短裾長袖舞翩翩作態行經玳瑁筵細點香鞵跳火鳳
輕梳雲鬢薄冰蟬欲將調笑欺阿軟便擬橫陳得小憐
粉汗未乾蘭氣重更看結束上鞦韆

箇儂

箇儂遙隔水盈盈少小蘭房已目成未信紅顏皆薄命
卻憐名士每多情燈前恍見金釵影夢裏疑聞玉珮聲
一自相思同幻悟人間到處有蓬瀛

有寄

自從話別鬱金牀海角天涯恨共長此日鶯花都寂寞
當時雲雨總荒唐三年夢繞楊妃帳二月春殷宋玉牆
甚曰相逢訴離抱夜深想斷九迴腸

唱彈詞膳姑竟有絕色者戲贈

豈特城傾國亦傾燈前瘦影太熒熒眉如桂府初三月

腸斷陽關第四聲
五夜心情偏旖旎
一桮黑白莫分明
眼中世事聊如此
且耐溫柔賴有卿

壯懷堂詩二集卷三終

壯懷堂詩二集卷四

侯官林直子隅

五言絕句

節署絕句四首爲仲文中丞作

一鏡堂

節府無私地相教緩步尋華堂高處立明月到天心

塵塵軒

塵塵復塵塵一塵飛不到淨得六根塵來博拈花笑

梅麓亭

孤亭亦巍峩嘉名肇梅麓可知箇中身卻有脩來福

龍頭泉

水聲何潄潄源遠不知處夜深風雨多或恐化龍去
送春

庭院晴陰裏荼蘼已半開問春今日去何日復歸來
途中書所見

小雨喜初晴春塘正飛絮日晚少行人香車向何處
宮詞

滿地梅花影重門鎖不開問聲林際月今夜爲誰來
山行

山行日夕佳叢篁滴寒翠幽處一禽啼輕踏巖花墜

獨飲

獨飲出花前花深自成趣幽蘭悄無言含情炫秋露

古怨詞

閒階長芳草零露含滋日暮不相見春風吹鬢絲

詠帳

寶帳芙蓉緝幽香暗許通夜深秋月入猶自夢春風

少年行

門前油碧車門外枇杷花年少誰家子欲鞭醉狹斜

傷春

客裏傷春去當風瘦可憐閒花無賴甚獨自照愁眠

哀箏

乍弄已多感頻搗不耐聽
玉人坐翠幙相對一燈青
小長干曲

打槳風波惡聲聲玉臂寒
妾家何處是遙指小長干
飲酒

恥居今人前愧生古人後
物變自離奇但須飲美酒

江水

江水日夜去湯湯且未休
與時心不競辛苦爲誰流

詠眉

獨坐蹙雙蛾鉛華未銷歇
妝罷捲珠簾纖纖上新月

詠髮

霧鬢牙梳膩雲鬢寶鏡開容顏尤可鑑疑是麗華來

詠唇

小語雕闌外脂香不奈何櫻桃花正放處處發清歌

詠舌

攪盡丁香結津津味帶滋登盤饒海錯昨夜夢西施

舌海味之美者

七言絕句

題楊雪滄舍人擊楫圖卽以奉別

擊楫中流羨祖生披圖今復見豪情乘風破浪尋常事

看爾江湖萬里行

蒼茫煙水碧溪流余亦孤帆指建州從此天涯更惆悵
嶺雲江樹總生愁

午發洪山橋順風夜泊大麥溪有感

江上青山送卧遊西風兩日阻行舟晚來忽得吹噓力
百里居然在上流

水口舟中二首

清谿流水碧迢迢官渡風寒泊畫橈無那銷魂殘醉後
隔江煙雨一枝簫

細舫清歌傍夕生愁中江月不分明徐娘半老風情在

猶唱陽關第四聲

送鄭生之蜀兼寄姚藍坡大令

鄭生揖我巴西去客裏交情兩較親
曾語華陽賢令尹仲宣歲暮尙依人

喜得楊三子恂吳門書

殘年風景念江湖欲寄新詩一字無
忽報故人音訊至夜深寒雪過姑蘇

哀蘇州

征伐何分越與吳眼中春色黯姑蘇
錦衣戰士如花女

一例閒愁付鷓鴣

尊中有贈

微波輕縹夜潮初一曲清歌忽有餘訴盡千重萬重恨
江花江月渺愁予

碧漢

碧漢沈沈大海陰倚闌東望暮雲深今宵靈藥誰偷得
莫負姮娥愛汝心

示陳三次庚

滄海珍珠未易量扁舟明日到家鄉琵琶一曲勞君記
不是知音莫斷腸
爲人寄楚中故人

橘柚香中一醉吟晚風江上嫩寒侵因君爲憶瀟湘月
彈斷銀箏淚已深

宮詞

玉枕熏籠夢裏深珠簾月入漏沈沈昭陽歌舞平明歇
可識西宮此夜心

少年行

盤馬彎弓氣似虹鞭梢指處有奇功等閒繫得樓蘭頸
醉倒胡姬酒肆中

眼中那識左賢王走馬橫戈宿戰場不見居延千里月
豈知今夕在他鄉

得江嶷叔溫州詩札

故人辭祿弄扁舟
惠我新詩字字愁
身世日行荆棘裏
芒鞋竹杖過溫州

送人之袁浦

林煙漠漠雨絲絲
送客江干唱柳枝
君過揚州見明月
爲言十載此相思

春倦

困人天氣半陰晴
一榻茶煙夢不成
爲報春風欲歸去
綠楊東角語流鶯

傷春

萬里中原滿戰塵極天風雪正愁人江南歲晚無人到
祇有寒梅獨自春

宮詞

梧落烏啼金井闌月明西殿露華寒美人睡起閒階立
獨對嫦娥永夜看

代贈

碧杜紅蘅總可憐湘江流水綠娟娟青驄綰得王孫住
何處銀箏對月圓

芳心

一寸芳心不自持羞將楊柳鬪腰肢鮫綃帳子籠鬚席

恰好溫涼奈此時

有贈

咫尺蓬山事未諧
年年風雨怨天涯
含愁整遍琵琶索
一曲新聲紫玉釵

有見

珠襪香腰瘦可憐
春風相與致纏綿
含情獨立朱闌外
一樹梨花合比肩

聞怨

怨別年年花又紅
伯勞飛燕各西東
可知昨夜相思意
卻在輕寒淺夢中

贈某公子

碧雲初斷漏沈沈
客裏拋殘買笑金
紅燭青衫夜深去
何人相識淚痕深

征婦怨

江南三月草萋萋
卜遍金錢有淚啼
莫漫春風更惆悵
行人祇在碧雲西

寄楊三子恂

兩小才名相與同
別來歧路各西東
不知今夜青驄客
何處銀鬟倚燭紅

書所見

百尺高樓倚碧霄
芙蓉鏡檻夜迢迢
嫣然一笑腸堪斷
偷傍妝臺夢翠翹

杏花

吳王芳草迷香徑
金谷名花弔故園
獨對東風開笑口
何人相伴過黃昏

破鏡

一別花顏不再親
妝臺零落散芳塵
孤鸞舞罷增惆悵
夢斷孤芳鏡裏人

離筵

彈斷湘靈五十絃
蕭蕭寒雨急離筵
龍宮咫尺何曾到

獨向蓬萊望暮煙

花下飲

小酌荼蘼醉裏天
雙鬟何意促箏絃
殘花無數猶堪賞
寄語春風莫放顛

春宵

翠被香殘玉釧遙
滿窗花影度春宵
月明嗚咽鄰家笛
一夜愁情耿未消

卽事

從來好色似登徒
雲雨巫山事有無
宋玉牆東春色滿
不須脫帽看羅敷

晚涼

晚涼天氣罷新妝
玉步珊珊出洞房
欲試櫻桃簾影隔
暗風遞過口脂香

有寄

恃小憐癡兩不猜
病中深荷寄詩來
重門一夜春風盡
從此仙桃不再開

對面

柔腸久被秋眸翳
瘦骨還宜玉樹栽
渴鳳鰥魚無處著
豈知對面是陽臺

江上

江上秋殘落葉紛琵琶淒切那堪聞朱顏一笑渾無賴
腸斷西風白練裙

初起

座上芙蓉掌上珠玉牀初起不勝扶蘭湯浴罷聞呼婢
換取綃衣恰六銖

送人之蜀

年來正自怨離羣花落江南袂又分此去巴西行萬里
當鑪好覓卓文君

腸

酒肆歌筵斷幾回年年秋雨夢陽臺玉溪佳句新偷得

一寸相思一寸灰

有約

有約黃昏共玉杯
翠紅相倚復相偎
瓊樓未上心先怯
多恐鸚哥喚客來

當鑪曲

十五吳姬似解愁
當鑪不語卻含羞
使君莫漫輕調笑
不是文君未點頭

鄰婢

青絲覆額蹙雙蛾
明月雕欄解唱歌
累得牆東愁宋玉
拋殘紅豆已無多

惱雲

不似纏綿不似癡無端障眼最迷離等閒掩卻初三月
似妬嫦娥學畫眉

有贈

碧窗如水晚風尖茜袖瓊姿出繡簾一抹檀槽廣陵散
傷心瘦到玉纖纖

瑤池

王母瑤池碧漢間此身曾得侍清班碧桃結實三千歲
何處人間覓阿環

迴廊

千繞迴廊竟睡遲
夜深爲有月明知
偷桃竊藥尋常事
蚌蛤珠胎綻幾時

飲櫻桃花下有感

日向花間醉一卮
眼看朱實故離離
每從山鳥含殘後
卻憶將開未謝時

感舊

爲觸前塵憶舊歡
慵鶯懶蝶覺春闌
平臺歌舞今銷歇
豈獨傷心芍藥欄

殘花

隔院殘花不當春
朝來寶鏡漸生塵
枕邊餘有啼痕在

夢裏微聞怨別人

相思

春城處處有花枝
弄玉吹簫引鳳遲
一別揚州青鬢改
十年無淚寄相思

板橋曉別

淡淡銀河沒曉星
長亭送客柳條青
昨宵殘燭風簾下
一闋清歌不忍聽

野行書所見

春郊何處不銷魂
芳草萋萋澗壑喧
一抹紅霞通鳥道
漁郎誤認是桃源

野菊

十三間

地名

外竹籬笆皎皎秋英正吐花一點芳心誰惜

取清樽好與共生涯

爲人悼亡

青樓十日報春歸玉管無聲罷舞衣飛盡落花飄盡絮
懶蜂病蝶總依依

大盈驛

古道疑從夢裏回短階溜雨滿蒼苔分明眼底紅柑貢
十里香塵驛使來

游白鹿洞和周鐵臣

樊源

廉訪三首

古洞危凌海嶼孤
場來勝地見新圖
醇醪欲飲周公瑾
肯博山靈一醉無

分明眼底見滄波
落日帆檣取次過
逐逐頻年成底事
天涯舊雨已無多

買山有願拓巖扉
十載從戎亦倦飛
忍向秋風怨搖落
南來旅雁不曾歸

漳州雜詠八首

百粵河山瘴癘開
時清不築望烽臺
披襟小憩臨漳路
碧玉千峯入座來

開元古刹莽蕭條
烽火南州耿未消
愁絕駐師文信國

還期佛力佈清朝

文章禮教溯儒宗
領郡當年見古風
杖履衣冠原細事
祇今嘖嘖說文公

會稽小尉

鄭虎臣

亦奇男國憤親讎報
始甘日落循州西

去路鴉聲淒斷木
棉菴

眉樓風月金陵獄
兩地從容樂有餘
忠孝總應成佛去
瀕刑猶作數行書

脈清骨峻超塵表
梅雪

元凱

當時獨擅長欲爲詩人商
位

置章蘇州與孟襄陽

鷺島寒梅絕可憐
看花眼福飽殘年
清漳又見凌波襪

十里香風度水仙

浦南不及溪東種
文旦清香亦足多
贏得年年輪上貢
桂花風韻過蘋婆

贈歌者李翠林

團團明月照花顏
午夜清樽數往還
最是多情忘不得
一聲聲唱古陽關

戲贈

背人永日坐朱樓
瞥眼飛花只覺愁
料識雙旌東陌路
夢魂常逐鄭眉州

壯懷堂詩二集卷四終